

## **NESLUŽBENI PREČIŠĆENI TEKST**

*Službene novine Kantona Sarajevo, broj 30/05, 25/09, 22/11, 3/12, 1/13, 27/16 i 11/19*

# **ODLUKA**

## **O USKLAĐIVANJU STATUSA KANTONALNOG JAVNOG KOMUNALNOG PREDUZEĆA ZA TRANSPORT I DISTRIBUCIJU GASA "SARAJEVO-GAS" SARAJEVO SA ZAKONOM O JAVNIM PREDUZEĆIMA U FEDERACIJI BOSNE I HERCEGOVINE**

### **I - OSNOVNE ODREDBE**

#### **Član 1.**

Ovom odlukom osnivač Kanton Sarajevo, ulica Reisa Džemaludina Čauševića broj 1. Sarajevo, (u daljnjem tekstu: Osnivač) usklađuje oblik, firmu i način upravljanja u skladu sa Zakonom o javnim preduzećima u Federaciji Bosne i Hercegovine (u daljnjem tekstu: Zakon), utvrđuje visinu osnovnog kapitala i vrši usklađivanje djelatnosti Preduzeća u unutrašnjem prometu u skladu sa Odlukom o standardnoj klasifikaciji djelatnosti u Federaciji BiH i vrši upis prava obavljanja vanjskotrgovinskog poslovanja u skladu sa Zakonom.

#### **Član 2.**

Preduzeće, u skladu sa Zakonom, mijenja oblik i djelovat će kao Preduzeće sa ograničenom odgovornošću (u daljnjem tekstu: Preduzeće).

#### **Član 3.**

Preduzeće je pravni sljednik KANTONALNOG JAVNOG KOMUNALNOG PREDUZEĆA ZA TRANSPORT I DISTRIBUCIJU GASA "SARAJEVO-GAS" SARAJEVO, registrovanog Rješenjem Okružnog privrednog suda u Sarajevu broj U/I 712/82, Rješenjem Suda Udruženog rada broj: U/I 426/90, Rješenjem Višeg suda u Sarajevu broj UF/I 3430/94, i Rješenjem Kantonalnog suda u Sarajevu broj: UF/13857/97 od 26. 12. 1997. godine i ima svojstvo pravnog lica sa pravnom i poslovnom sposobnošću.

#### **Član 4.**

Preduzeće obavlja djelatnost imovinom koja mu je data na upravljanje, a koja je u cjelokupnom vlasništvu osnivača.

### **II - FIRMA I SJEDIŠTE PREDUZEĆA**

#### **Član 5.**

Preduzeće će poslovati pod firmom: Kantonalno javno komunalno preduzeće za snabdijevanje prirodnim gasom "Sarajevogas" d.o.o. Sarajevo.

Skraćeni naziv: KJKP "SARAJEVOGAS" d.o.o. Sarajevo.

## **Član 6.**

Sjedište preduzeća je u Sarajevu, Trg Fadile Odžaković Žute broj 4.

## **Član 7.**

Preduzeće ima pečat okruglog oblika u kome je ispisan puni naziv firme i štambilj četvrtastog oblika, koji sadrži puni naziv firme, a služi za ovjeru prijema podnesaka (akata).

Vrsta pečata i štambilja, način upotrebe i čuvanje utvrđuje se općim aktom koji donosi Uprava Preduzeća.

## **III - DJELATNOST PREDUZEĆA**

### **Član 8.**

Preduzeće obavlja djelatnosti i to:

- 33.12 Popravak mašina;
- 35.22 Distribucija plinovitih goriva distribucijskom mrežom;
- 35.23 Trgovina plinom distribucijskom mrežom;
- 42.21 Gradnja cjevovoda za tečnosti i plinove;
- 42.99 Gradnja ostalih građevina niskogradnje, d.n.;
- 43.21 Elektroinstalacijski radovi;
- 43.22 Uvođenje instalacija vodovoda, kanalizacije i plina i instalacija za grijanje i klimatizaciju;
- 43.29 Ostali građevinski instalacijski radovi;
- 43.99 Ostale specijalizirane građevinske djelatnosti, d.n.;
- 45.20 Održavanje i popravak motornih vozila;
- 46.71 Trgovina na veliko krutim, tečnim i plinovitim gorivima i srodnim proizvodima;
- 47.30 Trgovina na malo motornim gorivima u specijaliziranim prodavnicama;
- 47.78 Ostala trgovina na malo novom robom u specijaliziranim prodavnicama;
- 49.50 Cjevovodni transport;
- 52.21 Uslužne djelatnosti u vezi s kopnenim prijevozom;
- 56.29 Ostale djelatnosti pripreme i usluživanja hrane;
- 58.19 Ostala izdavačka djelatnost;
- 58.29 Izdavanje ostalog softvera;
- 62.01 Računarsko programiranje;
- 62.03 Upravljanje računarskom opremom i sistemom;
- 63.11 Obrada podataka, usluge hostinga i djelatnosti u vezi s njima;
- 63.12 Internetski portali;
- 63.99 Ostale informacijske uslužne djelatnosti, d.n.;
- 70.21 Odnosi s javnošću i djelatnosti saopćavanja;
- 70.22 Savjetovanje u vezi s poslovanjem i ostalim upravljanjem;
- 71.11 Arhitektonske djelatnosti;
- 71.12 Inženjerske djelatnosti i s njima povezano tehničko savjetovanje;
- 71.20 Tehničko ispitivanje i analiza;
- 72.19 Ostalo istraživanje i eksperimentalni razvoj u prirodnim, tehničkim i tehnološkim naukama;
- 72.20 Istraživanje i eksperimentalni razvoj u društvenim i humanističkim naukama;
- 73.20 Istraživanje tržišta i ispitivanje javnog mnijenja;
- 74.90 Ostale stručne, naučne i tehničke djelatnosti, d. n.;
- 82.99 Ostale poslovne pomoćne uslužne djelatnosti, d.n.;

85.60 Pomoćne uslužne djelatnosti u obrazovanju;  
95.11 Popravak računara i periferne opreme.

#### **Član 9.**

Djelatnost Preduzeća u vanjskotrgovinskom poslovanju glasi:

- Vanjskotrgovinski promet iz okvira registrovane djelatnosti.

#### **Član 10.**

Preduzeće može obavljati poslove samo u okviru djelatnosti upisane u sudski registar.

Preduzeće može obavljati i druge poslove koji se uobičajeno obavljaju uz djelatnosti upisane u sudski registar, u obimu i na način koji su potrebni za poslovanje, a ne predstavljaju obavljanje tih poslova kao redovne djelatnosti.

### **IV - SREDSTVA ZA RAD**

#### **Član 11.**

Osnovni kapital Preduzeća čini novac, iskazan u novčanom iznosu od 10.000,00 KM, odnosno 100% udjela.

Osnovni iznos kapitala se ne može smanjivati ispod iznosa utvrđenog zakonom.

Osnivač može u toku poslovne godine povećati vrijednost osnovnog kapitala Preduzeća novim ulaganjem.

#### **Član 12.**

Povećanje i smanjenje osnovnog kapitala vrši se na osnovu odluke osnivača.

#### **Član 13.**

Preduzeće ima fond rezervi.

Statutom Preduzeća propisuju se statutarne rezerve, utvrđuje namjena i način njihovog korištenja.

### **V - PRAVA, OBAVEZE I ODGOVORNOSTI U PRAVNOM PROMETU**

#### **Član 14.**

Sredstva Preduzeća su u pravnom prometu.

Preduzeće u pravnom prometu zaključuje ugovore i vrši druge pravne poslove i radnje u okviru svoje pravne sposobnosti.

## **Član 15.**

Preduzeće odgovara za svoje obaveze cjelokupnom imovinom osnivača, koja mu je data na korištenje, osim prirodnih bogatstava i dobara u općoj upotrebi.

Preduzeće odgovara i za obaveze drugih društava preuzete ugovorom.

## **VI - ORGANI PREDUZEĆA**

### **Član 16.**

Organi Preduzeća su:

1. Skupština,
2. Nadzorni odbor,
3. Uprava, kao organi upravljanja i
4. Odbor za reviziju.

### **Član 17.**

**1. Skupština** odlučuje o:

- donošenju Statuta Preduzeća i njegovim izmjenama i dopunama,
- raspodjeli godišnje dobiti i pokriću gubitka,
- povećanju i smanjenju osnovnog kapitala,
- osnivanju novih preduzeća,
- planu poslovanja, investiranju i trajnoj poslovnoj saradnji, odnosno povezivanju sa drugim preduzećima,
- etičkom kodeksu i Poslovniku Skupštine,
- imenovanju i razrješenju Nadzornog odbora i Odbora za reviziju,
- usvajanju godišnjeg izvještaja Preduzeća koji uključuje finansijski izvještaj i izvještaj revizora,
- Nadzornog odbora i Odbora za reviziju,
- promjeni oblika i podjeli Preduzeća,
- naknadama članovima Nadzornog odbora i Odbora za reviziju,
- ostalim pitanjima u skladu sa Zakonom o privrednim društvima i Zakonom o javnim preduzećima i Statutom Preduzeća.

### **Član 18.**

**2. Nadzorni odbor** je nadležan da:

- priprema i predlaže Etički kodeks, poslovnike i druge akte koje usvaja Skupština preduzeća,
- imenuje i razrješava Upravu u skladu sa Statutom Preduzeća,
- predlaže kandidate za Odbor za reviziju u skladu sa Zakonom,
- razmatra i nadzire postupak javnih nabavki,
- daje mišljenje Skupštini o prijedlogu Uprave o rasporedu dobiti,
- odlučuje o ostalim pitanjima u skladu sa Zakonom o privrednim društvima, Zakonom o javnim preduzećima i Statutom Preduzeća.

### **Član 19.**

Vršenje pojedinih poslova iz prethodnog člana Nadzorni odbor može povjeriti jednom od svojih članova, a predsjednik Nadzornog odbora je solidarno odgovoran sa članom Nadzornog odbora kojem je povjereno ovlaštenje.

### **Član 20.**

Nadzorni odbor ima predsjednika i dva člana.

Prilikom imenovanja članova Nadzornog odbora, primjenjivat će se odredbe Zakona o privrednim društvima, Zakona o javnim preduzećima u Federaciji Bosne i Hercegovine i Statuta Preduzeća  
Predsjednik i članovi Nadzornog odbora imenuju se istovremeno na period od četiri godine.

Za predsjednika i člana Nadzornog odbora ne može biti imenovano lice kod kojeg postoje zapreke iz odredaba člana 260. Zakona o privrednim društvima.

### **Član 21.**

Sjednica Nadzornog odbora održava se najmanje jednom u tri mjeseca.

Sjednicu Nadzornog odbora saziva predsjednik Nadzornog odbora.

### **Član 22.**

Za održavanje sjednice Nadzornog odbora potreban je kvorum od dvije trećine ukupnog broja članova. Nadzorni odbor donosi odluke većinom glasova prisutnih članova.

Rad Nadzornog odbora će biti regulisan Poslovníkom o radu Nadzornog odbora.

### **Član 23.**

#### **3. Uprava**

Uprava vodi poslovanje i zastupa Preduzeće.

Uprava je nadležna za izvještavanje Nadzornog odbora i provedbu Etičkog kodeksa, izradu i realizaciju planova poslovanja i postupka nabavke, te predlaganje raspodjele dobiti, prijem zaposlenika i regulisanje njihovog radno pravnog statusa.

Funkciju uprave vrši direktor i izvršni direktori Preduzeća.

Statutom Preduzeća će se bliže urediti sastav Uprave.

Uprava se bira, imenuje i razrješava u skladu sa postupkom utvrđenim u Statutu Preduzeća, na osnovu javnog konkursa iz reda kandidata, koji najbolje odgovaraju za obavljanje poslova, a ne mogu imati funkciju u političkim strankama.

Direktor može vršenje neposrednog nadzora iz nadležnosti Uprave povjeriti izvršnom direktoru, ali i dalje ostaje solidarno odgovoran sa izvršnim direktorom za izvršavanje propisanog posla.

#### **Član 24.**

Direktor predsjedava Upravom, rukovodi poslovanjem, zastupa i predstavlja preduzeće i odgovara za zakonitost poslovanja.

#### **Član 25.**

Direktor Preduzeća je ovlašten da u ime Preduzeća zaključuje ugovore i vrši druge pravne poslove i radnje, kao i da Preduzeće zastupa pred sudom i drugim organima.

Direktor Preduzeća podnosi prijavu za upis u sudski registar i preduzima sve druge radnje vezane za registraciju Preduzeća.

#### **Član 26.**

Direktor Preduzeća može putem prokure prenijeti ovlaštenje na druga lica u Preduzeću ili van njega u skladu sa Zakonom o privrednim društvima.

#### **Član 27.**

Direktor Preduzeća organizuje i rukovodi procesom rada i vodi poslovanje Preduzeća, samostalno donosi odluke, zastupa Preduzeće u odnosima sa trećim licima i odgovoran je za zakonitost rada Preduzeća osnivaču.

#### **Član 28.**

Izvršni direktori organizuju rad, zastupaju i predstavljaju Preduzeće i odgovaraju za zakonitost poslovanja u obimu koje im odredi direktor, a što se utvrđuje posebnim rješenjem koje donosi direktor Preduzeća.

#### **Član 29.**

**Brisan.**

#### **Član 30.**

### **4. Odbor za reviziju**

Odbor za reviziju dužan je da:

- imenuje vanjskog revizora i direktora odjela za internu reviziju u skladu sa Zakonom,
- razmotri godišnju strategiju rizika i plan revizije, te preduzme mjere i aktivnosti na korekciji utvrđenih propusta,
- osigura uslove Odjelu za internu reviziju da izvrši svoj posao u skladu sa planom revizije i izvršava svoje obaveze u skladu sa važećim standardima,
- preduzima mjere da interna kontrola u Preduzeću bude adekvatna i efikasna,
- podnosi mjesečne izvještaje Nadzornom odboru Preduzeća o radu i preduzetim mjerama.

Odbor za reviziju je dužan svoje nadležnosti vršiti u skladu sa odredbama Zakona o javnim preduzećima i Zakonom o privrednim društvima.

## **VII - UNUTRAŠNJA ORGANIZACIJA PREDUZEĆA**

### **Član 31.**

Preduzeće posluje kao jedinstveni pravni subjekt, a može imati i svoje podružnice koje će u pravnom prometu istupati u ime i za račun Preduzeća u granicama ovlaštenja koje dobije od Osnivača.

Unutrašnja organizacija Preduzeća utvrdit će se Statutom Preduzeća.

## **VIII - USLOVI ZA OBAVLJANJE VANJSKOTRGOVINSKE DJELATNOSTI**

### **Član 32.**

Preduzeće vanjskotrgovinsku djelatnost obavlja u skladu sa važećim odredbama Zakona o vanjskotrgovinskom poslovanju, pridržavajući se dobrih poslovnih običaja i poslovnog morala sa pažnjom dobrog privrednika.

Preduzeće je posebno dužno da u spoljnotrgovinskom poslovanju vodi računa o zaštiti ugleda i interesa Bosne i Hercegovine.

## **IX - PRAVA I OBAVEZE OSNIVAČA I ZAPOSLENIH RADNIKA**

### **Član 33.**

Preduzeće ima Skupštinu.

U ime Osnivača prava i obaveze vrši Skupština preduzeća, koja se sastoji od predsjednika i dva člana.

Imenovanje i razrješenje predsjednika i članova Skupštine Preduzeća vrši se na način da iste, na prijedlog Ministarstva prostornog uređenja i zaštite okoliša Kantona Sarajevo, uz saglasnost Vlade Kantona Sarajevo, potvrđuje Skupština Kantona Sarajevo.

Proceduru imenovanja i razrješenja predsjednika i članova Skupštine preduzeća provodi Ministarstvo prostornog uređenja i zaštite okoliša Kantona Sarajevo, u skladu sa Zakonom o ministarskim, vladinim i drugim imenovanjima Federacije Bosne i Hercegovine.

Proceduru iz prethodnog stava može pokrenuti ministar, Vlada Kantona i Skupština Kantona Sarajevo.

Sastav Skupštine Preduzeća utvrđuje posebnom odlukom Skupština Kantona Sarajevo na prijedlog Vlade Kantona, a Vlada Kantona na prijedlog resornog ministarstva.

Rad Skupštine Preduzeća reguliše se Poslovníkom o radu Skupštine Preduzeća.

Skupština preduzeća dužna je u roku od 15 dana od dana imenovanja usvojiti Poslovník o radu Skupštine.

Imenovanje iz stava 3. ovog člana vrši se na period od dvije godine, sa mogućnošću ponovnog izbora.

Predsjednik i članovi Skupštine Preduzeća imaju pravo na naknadu za svoj rad, koja se utvrđuje posebnom odlukom Vlade Kantona.

## **X - PLANIRANJE POSLOVANJA I RAZVOJA I POSLOVNE KNJIGE PREDUZEĆA**

### **Član 34.**

Preduzeće planira svoje poslovanje i razvoj i odlučuje o vršenju, vrsti i sadržini planova poslovanja i razvoja Preduzeća.

Preduzeće planiranje poslovanja i razvoja prilagođava ciljevima radi kojih je osnovano i uslovima djelovanja zakonitosti tržišta.

### **Član 35.**

Preduzeće donosi trogodišnje planove poslovanja.

Preduzeće će usaglašavati trogodišnji plan poslovanja sa kretanjima uslova poslovanja, odnosno vršiti revidiranje trogodišnjeg plana na godišnjem nivou.

### **Član 36.**

O radu i poslovanju Preduzeća vode se poslovne knjige u skladu sa Zakonom. Preduzeće je dužno za svaku poslovnu godinu, u skladu sa važećim zakonskim propisima, sastaviti periodični obračun i završni račun.

## **XI - UTVRĐIVANJE I RASPOREĐIVANJE DOBITI**

### **Član 37.**

Utvrđivanje prihoda, rashoda i rezultata poslovanja vrši se polugodišnjim i godišnjim obračunom u skladu sa zakonom.

### **Član 38.**

Dobit koja ostaje Preduzeću predstavlja neto (čistu) dobit. Neto dobit je finansijski rezultat poslovanja Preduzeća u toku poslovne godine, koja se dobije poslije odbitka svih troškova poslovanja i svih davanja po osnovu doprinosa, poreza i drugih finansijskih tereta.

### **Član 39.**

Osnivač na kraju poslovne godine odlučuje o raspodjeli dobiti u skladu sa zakonom.

### **Član 40.**

Ako Preduzeće u poslovanju po završnom računu iskaže gubitak, taj gubitak će se prvenstveno pokriti iz sredstava Preduzeća, koja se u skladu sa propisima mogu koristiti za pokrivanje gubitka. Ukoliko se gubitak ne može pokriti iz sredstava Preduzeća pokreće se postupak u skladu sa zakonom.



## **XII - OPĆI AKTI PREDUZEĆA**

### **Član 41.**

Opći akti Preduzeća su Statut i drugi akti kojima se na opći način regulišu odnosi u Preduzeću.

Preduzeće je obavezno da, u roku od 60 dana od donošenja ove odluke, donese Statut Preduzeća.

## **XIII - TRAJANJE I PRESTANAK PREDUZEĆA**

### **Član 42.**

Preduzeće je osnovano na neodređeno vrijeme i traje dok postoje ekonomski i zakonski uslovi za njegovo postojanje.

Preduzeće prestaje:

- odlukom Osnivača, i
- u slučajevima predviđenim zakonom.

## **XIV - NAČIN IZMIRENJA TROŠKOVA USKLAĐIVANJA PREDUZEĆA I POSLJEDICE NEUSPJELOG USKLAĐIVANJA**

### **Član 43.**

Sve troškove usklađivanja statusa Preduzeća sa Zakonom snosi Preduzeće.

## **XV - PRELAZNE I ZAVRŠNE ODREDBE**

### **Član 44.**

Na pitanja koja nisu regulisana odredbama ove odluke shodno se primjenjuju odredbe Zakona o javnim preduzećima u Federaciji Bosne i Hercegovine i Zakona o privrednim društvima.

Stupanjem na snagu ove odluke prestaje primjena Odluke o organizovanju JKP "Sarajevo-gas" Sarajevo ("Službene novine Grada Sarajeva", broj 9/93) i Odluke o preuzimanju prava osnivača Javnog komunalnog preduzeća "Sarajevo-gas" Sarajevo.

Skupština Kantona Sarajevo će u roku od 6 mjeseci od dana stupanja na snagu ove odluke odrediti koja prirodna bogatstva i dobra od općeg interesa i sredstva kojima posluje javno preduzeće su u državnom vlasništvu, odnosno vlasništvo Kantona Sarajevo.

Vrijednost i vlasnička struktura kapitala u KJKP "Sarajevo-gas" Sarajevo, sa stanjem 31. 12. 2005. godine, utvrdit će se u roku od 12 mjeseci od dana stupanja na snagu ove odluke.

Ova odluka, odnosno oblik organizovanja će se uskladiti sa utvrđenom vlasničkom strukturom kapitala u roku od 60 dana od dana donošenja rješenja.

### **Član 45.**

Ova odluka stupa na snagu danom objavljivanja u "Službenim novinama Kantona Sarajevo".